

Naalakkersuisut nunatsinni eqqumiitsuliortut atorsinnaasaannik eqqumiitsuliortut suliffiannik pilersitsisinnaanermi pitsaaqutinik pitsaannequtinillu imaqartumik suliniummut pilersaarummik suliaqaqqullugit, suliniummullu pilersaarut kingusinnerpaamik UPA2020-imi Inatsisartunut agguanneqassasoq, pilersitsinermilu ingerlatsinermilu aningaasaqarnermut allanullu tunngasunik misissueqgissaarnermik imaqaqassalluni. Tamatuma saniatigut Naalakkersuisut eqqumiitsulioriaatsit sorliit sullivimmut taamaattumut periarfissaqarnermik iluaquteqassanerat pillugit kaammattuuteqarnissaannik tunngasunik Inatsisartuni aalajannigffigisassatut siunnersuut.

(Inatsisartuni ilaasortaq Aqqaluaq B. Egede, Inuit Ataqatigiit)
pillugu

Kultureqarnermut, Ilinniartitaanermut, Ilisimatusarnermut Ilageeqarnermullu ataatsimiititaliap

siunnersuutip aappassaaneerpeqarneranut

ISUMALIUTISSIISSUTAA

Siunnersuutip aappassaaneerpeqarnerani saqqummiunneqartoq

Kingullermik suliarinninnermini ataatsimiititaliap ilaasortarai:

Inatsisartunut ilaasortaq Doris J. Jensen, Siumut, siulittaasoq

Inatsisartunut ilaasortaq Mimi Karlsen, Inuit Ataqatigiit, siulittaasup tullia

Inatsisartunut ilaasortaq Laura Táunâjik, Siumut

Inatsisartunut ilaasortaq Nivi Olsen, Demokraatit

Inatsisartunut ilaasortaq Sofia Geisler, Inuit Ataqatigiit

Siunnersuut ulloq 5. november 2018 siullermeerpeqarnerata kingorna ataatsimiititaliamit misissorneqarpoq.

1. Siunnersuutip imarisai siunertaalu

Naalakkersuisut eqqumiitsuliortut suliffiannik tamatigoortumik pilersitsinissamut pilersaarummik suliaqarnissaat siunnersuuteqartumit kissaatigineqarpoq. Suliniummut pilersaarutip makku imarissavai:

- Pilersitsinissami periarfissanik ujartuineq,
- Eqqumiitsuliortut suliffiannik tamatigoortumik pilersitsinermi pitsaaqutit pitsaanngequtillu pillugit nalunaarussiaq,
- Pilersitsinermi ulluinnarnilu ingerlatsinermi aningaasatigullu kingunissaritinneqartut misissornissaat kiisalu
- Eqqumiitsuliornermi sulliviup tamatigoortup eqqumiitsuleriaatsinut sorlermut naleqqussinnaaneranut innersuussinertaqassaaq.

Kingusinnerpaamik UPA2020-mi suliniummut pilersaarut inatsisartunut saqummiunneqassasoq kissaatigineqarpoq.

Eqqumiitsuliortut suffimmi atugaasa aamma aningaasatigut isertitaasa nukittorsarneqarnissaat pillugu suliniutitut pilersaarussiaq eqqumiitsuliortut suliffiannik tamatigoortumik pilersitsinissamut tunngaviussasoq siunnersuummi takuneqarsinnaavoq.

2. Siunnersuuteqartumik ataatsimeeqatiginninneq

Ataatsimiititaliap siunnersuummik suliaqarneranut atatillugu, siunnersuut pillugu oqaloqatigiinnermi siunnersuuteqartoq peqataavoq. Ataatsimiititaliap suliaanut oqaloqatigiissutigineqartut ilanngunneqarput.

3. Ataatsimiititaliap siunnersuummik suliarinninnera

Siunnersuutip matuma taasissutissartaani takuneqarsinnaavoq akuerineqassagaluarpat eqqumiitsuliortut suliffiannik tamatigoortumik pilersitsinissamut piumasaqaatitaqanngittoq. Tassa, pilersitsinissamut suliniutissatut pilersaarusiornissamik suliaqarneq kisimi eqqartorneqarpoq, tassungalu ilanngullugit pilersitsinermi ulluinnarnilu ingerlatsinermi aamma aningaasatigut kingunissaasa misissorneqarnissaat. Siunnersuuteqartup qulaanniittunik kaammattuuteqarnissamik kissaateqarneranut tunngatillugu Naalakkersuisut eqqumiitsulioriaatsimik eqqumiitsulioriaatsinut allanut naleqqiullugu salliutitsinissaannik kissaatitut ataatsimiititaliamit taanna paasineqanngilaq. Tamatumunnga taarsiullugu siunnersuut ima innersuussinermi paasineqarpoq, siunnersuutigineqartutut eqqumiitsuliornermik sullivik tamatigoortoq pilersinneqassappat eqqummiitsulioriaatsit ataasiakkaat pitsaaqutigisinnaasaat tunngavigineqassasut. Tamanna aamma peqataasunik attuumassuteqartunik – assersuutigalugu eqqumiitsuliortunik peqataatitsisoqarnissaannik siunnersuuteqartup kissaateqarnera aallaavigalugu isigineqassaaq.

Tamatumunnga atatillugu Eqqumiitsuliornermik sulinermut tunngatillugu ataatsimiititaliamit eqqumaffigeqquneqassaaq Naalakkersuisut Kommunalbestyrelsillu pineqartut akornanni akisussaaffiit agguataagaanerat. Akisussaaffiit agguataagaanerat takuneqarsinnaavoq eqqumiitsuliorneq pillugu inatsisini kap 2-mi.

Inatsisit tunngavigalugit eqqumiitsuliornemik suliaqarnermik kalaallit nunaanni siuarsaanissaq tamatuminnгалу nunatsinnut nunanullu allanut siaruarterinissaq Naalakkersuisut akisussaaffigaat. Tamatuma saniatigut kalaallit eqqumiitsuliaannik nunanilu allani eqqumiitsuliornemik ingerlatanik siammasissumik tamatigoortumillu nunatsinni inuttaasut pissarsisinnaanerannik Naalakkersuisut sapinngisamik qulakkeerinnissapput. Inatsisit tunngavigalugit Naalakkersuisut pisussaaffiisa ilagaat eqqumiitsuliornemik suliaqarnermut siaruarterinernullu aningaasatigut tapersersuinissaq. Tamakkua saniatigut Naalakkersuisut illutatigut avatingiisitigullu atugassiissutinik il.il naleqquttunik pilersitseqataasinnaapput. Kingullermi oqaatigineqarpoq siunnersuummik matumani pineqartumik eqqumiitsuliornemut sullivimmik tamatigoortumik pilersitsinissamut pisussaaffik Naalakkersuisuniittoq, eqqumiitsuliortut sumiluunniit najugaqaraluarpara.

Taamaalilluni aallaaviuvoq Naalakkersuisut tamatumunnga atatillugu pisussaaffiat nunamut tamarmut tunngatinneqarnerusoq nunallu tamat akornannut siammarterinissamik isiginninniarnerusussaalluni, Kommunalbestyrelsit pisussaaffii sumiiffinni pissutsinut tunngassuteqarnerullutik. Pingaarnertulli aallaavik tamanna pisussaaffinnik qaangiillutik Naalakkersuisut imaluunniit kommunalbestyrelsit iliuuseqarsinnaanerannik mattussinngilaq, inatsisimmi iliuuseqarsinnaanermut aalajangersakkat takukkit.

Suliniutissatut pilersaarusiornissamut siunnersuummut uunga tunngatillugu, eqqumiitsuliornemut inatsimmi ima allassimasoqarpoq:

§ 6. Naalakkersuisut aamma kommunalbestyrelsi illut, init sinaakktissallu tigussaasut allat eqqumiitsuliornemik ingerlatsinermut imaluunniit eqqumiitsuliornemik ingerlatsinerup saqqummiunnissaanut atorneqartut sanaartornerinut, nutarternerinut ingerlannerinullu tapiissuteqarsinnaapput, tamatumunnga ilanngullugit init saqqummersitsiviit, filmertarfiit, isiginnaartitsisarfiit, init sungiusarfiit aamma ataatsimiittarfiit katersortarfiillu.

Nalinginnaasumik nassuiaatini aalajangersagaq pillugu ima allassimavoq:

”Illut, init sinaakktissallu timitallit allat eqqumiitsuliornemik ingerlatsinermut tamatumaluunniit saqqummiunneranut atorneqartut taagorneqarnerat tamakkiisuunngilaq.

Tapiinissamut periarfissap qularnaassavaa, Naalakkersuisut nammineq aamma kommunalbestyrelsip nammineq sammisaqaatit nuna tamakkerlugu imaluunniit sumiiffinni ataasiakkaani pisariaqatinneqartutut isigineqartut pilersissinnaagaat tapersersinnaagaalluunniit.”

Siunnersuutigineqartutut eqqumiitsuliornemut sullivimmik pilersitsinissaq Naalakkersuisut

pissusissamisoorinngilaat, tassami eqqumiitsuliortut illoqarfimmi pineqartumi najugaqanngitsut sullivik atorsinnaassanngimmassuk, tamanna Naalakkersuisut akissuteqaataanni atuarneqarsinnaavoq. Aalajangersakkap qulaani pineqartup tassungalu nassuiaatit paasineqarnissaanut atugassatut matumuuna siunnersuutip appasaanneernejarnissaanut Naalakkersuisut ataani pineqartoq pillugu nassuiaateqaqqullugit ataatsimiititaliamit qinnuigineqarput:

- Eqqumiitsuliornermi inatsisimmi § 6 tunngavigalugu nuna tamakkerlugu pisariaqartitsineq tunngavigalugu illuutit, init avatagiisitigullu atugassaritineqartut allat suut pingaaruteqarpat? (aalajangersakkami taaneqartut aalajangersimasut saniatigut).

4. Siunnersuutip aningaasatigut kingunerisassai

Inatsisartut suleriaasianni § 33-mi allassimasut tunngavigalugit siunnersuutip piviusunngortinneqarnerani aningaasartuutit allaffissornermilu kingunissaritinneqartut siunnersuutip oqaaseqaataanut ilanngunneqassapput. Siunnersuutip piviusunngortinneqarnerani aningaasatigut kingunissaritinneqartut pillugit, tamanna eqqortumik nalunaarutigineqarsimasoq ataatsimiititaliamit maluginiarneqarpoq.

Taamaalillugu suliniuteqarnissamut pilersaarutip piviusunngortinneqarnerani aningaasartuutit AC-mik atorfillip ukiumi ataatsimi aamma ukiup aappaata affaani aningaasarsiaasa, tassa 500.000 – 750.00 kr-nillu missaannik annertussuseqarnissaat siunnersuuteqartumit missiliorneqarsimavoq. Tamanna pillugu ataatsimiititaliaq annertunerusumik oqaaseqaateqassalluni tunngavissaqarsorinngilaq.

5. Ataatsimiititaliap inassuteqaatai

Ataatsimiititaliami **amerlanerussuteqartut** Siumumiit aamma Demokraatinit siunnersuut **itigartitsissutigineqarnissaa** innersuutigaaat.

Ataatsimiititaliami **ikinnerussuteqartut** Inuit Ataqatigiinneersut siunnersuut akuersissutigineqarnissaata innersuusutiginnissaa **akuersissutigivaat**.

Taamatut oqaaseqarluni isumaliutissiisummilu allassimasutut paasinnillutik matumuuna siunnersuut ataatsimiititaliap aappassaanniigassanngortippaa.

Doris J. Jensen
Siulittaasoq

Mimi Karlsen
Siulittaasup tullia

Laura Táunâjik

Nivi Olsen

Sofia Geisler